

# Gobernador tambe ta mira importancia pa sigui cu e plataforma di Dialogo Social

ORANJESTAD (AAN) -- Despues di e conferencia di prensa den Bestuurskantoor, diabierna mainta, en conexcion cu entrega di e documento "Smart Growth Pathways" entre Presidente di Carbon War Room, dr. Jose Maria Figueres y gobierno di Aruba, Minister Presidente demisionario mr. Mike Eman, a contesta pregunta riba otro temanan cu miembronan di prensa tabata tin pa haci. Den e marco aki el a referi na e encargo cu el a ricibi for di Gobernador pa bira Formador di su di dos Gabinete, basa riba e mayoria di voto cu Partido AVP a haya.



Diamars Gobernador a transmiti pa medio di un carta, e puntonan cu na su parecer mester tin atencion importante di e gobierno nobo: na prome lugar e crecimiento economico cu mester continua den e mesun direccion di re-vivencia cu tabata tin e ultimo lunanan y

cu e buskeda di e di tres pilar economico ta importante: pa e sigui cu e filosofia di traduci e crecimiento economico na bienestar general. Di dos, Gobernador a haya importante pa continua cu e linea di busca consenso den nos comunidad y cu e ta mira e importancia di e plataforma di dialogo cu e partnernan social; di tres pa e sigui construi riba mehoracion den e relacionnan di Aruba cu Reino Hulandes.

Formador mr. Mike Eman a agrega cu Gobernador a enfatiza riba e retonan riba finanzanan publico cu nos pais ta bay enfrenta hunto cu e continuacion pa reforma nos

fondonan di pension APFA y AOV ademas di AZV.

Esakinan ta retonan cu ta acompaña un pais ora e ta haya cu longevidad unda cu mas y mas hende ta bira grandi, locual tin su impactonan riba e fondo di pension, peticion pa cuida medico, y tur esaki ta aspectonan cu Gobernador kier mira cu e siguiente gobernacion duna atencion.

Formador Eman a agrega cu Gobernador ta mira cu den futuro, gobierno tin hopi trabao pa haci pa laga e economia crece, hiba finanzanan publico na un situacion di presupuesto balansa.